

摘藻堂四庫全書薈要

集部

欽定四庫全書薈要

集部

御選明詩卷五十二

詳校官原任主事

臣李斯咏

欽定四庫全書薈要卷一萬八千五百五十二

集部

御選明詩卷五十二

五言律詩三

管訥

遊寶林寺

金碧絢樓臺禪關向北開
水分雙澗出雲擁萬峰來
古佛遺香火殘僧話劫灰
黃塵吾老矣何幸一徘徊

獨坐

獨坐茅堂上長吟不下牀
亂書堆几席疎雨過陂塘
野燕衝簾入汀花度水香
應須存晚計次第學耕桑

發新河次韻

自忝王門祿頻年此地過
秋風迴遠道暮雨宿新河
白浪鷗邊小青山鴈外多
容杯相慰藉一酌總恩波

田家

偶過吳家墅殘陽半掩扉
遠汀低樹密小徑雜花稀
新酒浮筍醖鮮鱗墜釣肥
年來任疎嬾一醉即忘歸

春城俯平野草色靜柴門魚蟹舟中市桑麻屋後村遣
兒招社飲為客置盤飧老計能如此陶然付一尊

從征古州蠻迴塗紀驛

發靖州

晨發渠陽郡歸心一惘然離家今五月為客已中年暮
雨行人裏春泥去馬前洪江明日到沽酒上官船

洪江

夜過安江驛停舟不敢行亂山藏月色暗石鼓灘聲干

里從軍事中宵感客情不眠聊伏枕天白更東征

江口

江口何年驛過逢欲雨天居人張夜火使客換春船雲
起崇山外江通潏浦前鷓鴣灘已過今夕解衣眠

武溪

武陵溪上驛因紀武陵名樹列千旗勢江喧萬鼓聲生
苗今向化落草久無兵好載桐槽酒沿山看晚晴

怡溶

王程不敢緩四日下辰陽古木將軍廟春波使者航城
依山勢險江納雨聲長莫上觀瀾閣傷心在異鄉

清浪

天設非常險舟航豈易過大風掀逆浪暗石起盤渦行
路難如此垂堂意若何榜人殊可怪不住唱蠻歌

武口

擾擾天涯客悠悠武口船年光雙鬢裏春事百花前浮
世身如寄還家夢屢牽明朝過湖去風熟片帆懸

明山

已遂南遊興歸帆過洞庭浪花風裏白汀草雨中青一點塵無染千杯酒亦醒好將江叟笛吹與老蛟聽

江行二首

夜度繁昌夾雲帆萬斛船岼燈疎樹裏江笛晚風前水急潮迴渚江空月在川年年来復往華髮漸盈顛

行行幾百里又過十三磯宿鴈逢沙落驚鳬帶水飛山寒花寂寞江晚樹依稀自笑無家客他鄉亦當歸

顧祿

憩山中古寺

行春過遠村鞍馬憩山門畫壁神儀古鐫厓佛像尊
鼠翻殘瓦墜龍出小池渾亦欲詢興廢苔碑字半昏

懷思復錢先生

每憶錢夫子才名世少同賦傳羅刹盛詩擬拾遺
工儒術翻多誤官資惜未崇空令虞學士期薦玉堂中

次韻夜泊二首

海近潮初上江清天倒流故鄉頻入夢此地獨維舟落
鴈沈霜鏡潛魚避月鉤不眠催早發歷歷數更籌

城郭還依舊人民似昔非故鄉南去遠奉使壯來稀水
落波聲小天空月色微客舟隨處宿浪跡幾時歸

王翰

龍江別意

送客都門道旗亭酒一尊雨餘芳草合風定落花繁曉
樹連雲暗春江帶雨渾明朝定相憶遙望一銷魂

題山居幽趣圖

幽人愛岑寂林下築幽居
觸石雲生谷通泉溜決渠
鶴眠春院靜猿去晚林疎
時有採芝客商歌振碧虛

山居幽趣

買得青山好林居事事清
晚窗分竹色夜枕落泉聲
露滴琴書潤雲隨杖几生
未能脫簪笏猿鳥漫忘情

過九江府

早發潯陽岸秋風鴻鴈高
谷容通窈窕江色變蒲萄
堅

壁雄千雉危檣艤萬艘琵琶亭下水猶似響檀槽

劉秩

冬日即事

縣邑干戈後城空寂寥山寒雲釀雪江晚月通潮壯
士征衫薄將軍戰馬驕只今邊境上誰是霍嫖姚

甘瑾

題何梅閣山居

迹不到城市逢人無厚顏一瓢風外樹雙屐雨中山流

水春喧碓歸雲暮掩關憂時心未已祇益髭毛斑

題張氏竹園別業

避難疎狂客長貧少定居採芝空有曲種樹豈無書擬
製東山屐看馳下澤車肯容疎嬾迹來與狎樵漁

梅溪宿徐橘隱者寓舍別後寄謝

不見故人久吟愁入髭絲試呼村舍釀細論草堂詩夜
雨西窗燭春風別墅棊滄洲如有約歲晚共襟期

蕭翀

奉呈子高劉先生

剪燭臨清夜開軒對白雲
眠遲詩共賦歌罷酒初醺
風起松聲近溪迴野色分別來
愁思滿南鴈正紛紛

余自流江將歸南溪劉先生亦還珠林賦此別
伯昂諸友

白紵明春雪清尊注晚霞
客行天共遠人醉月初斜
武岫神仙宅珠林處士家
東歸三十里好為寄梅花

宿平陸村

昔年曾此宿今日是重遊兵後人煙少村中草樹稠霧
開螢照夜月霽鴈鳴秋明發前途去逢人問鎮州

白範

薊州

西來山盡處始見薊州城地擁三門峻天迴一面平人
煙多戍卒市語雜番聲回首松亭道秋風幾日程

盧昭

送周仕宣南臺典史賦采香徑

遙憐采香徑還憶種香時
綠水紫蘭棹青娥駐綵旗
盈盈春滿把冉冉碧含滋
持贈鍾陵去芬芳慰所思

朱應辰

秋夜

鼓角動譙樓星河爛不收
梧桐雙井月砧杵一城秋
坐久銷清夜時危易白頭
舊遊零落盡歸興滿南州

李敬

復登方丈小樓次孟學韻

古寺經行處高懷愜晚秋白雲巖際塔紅樹水邊樓月
露天光近金銀夜氣浮遠公應好客寧惜片時留

朱昇

送人歸越

百戰一身存生還獨有君越山臨海盡吳地到江分暮
郭留晴靄荒林翳夕曛歸塗當歲晚霜葉落紛紛

杜環

題畫

每愛江山趣停杯看畫頻千峰青不斷萬里碧無垠雲
樹參差晚鷗波浩蕩春扁舟何處客飄泊正愁人

陳伯康

寄邠縣喻知縣

寄語邠州長何時過洛中相看兩舍許不得一尊同客
思瞻秋月鄉書遲早鴻潭懷臨別處每憾太怱怱

俞貞木

題王孟端山水

喬木靄春霽野水浸平沙山脊浮雲合巖腰細路斜攜
琴向江寺沽酒到漁家歸去幽居晚山童埽落花

薛敬

與范宣之何約之重遊隱學寺

薄言山寺去兩度出東郊湖草添新漲山禽改舊巢煙
霞野衲路鹿豕故人交鐘磬雲深處來聽幾度敲

吳舜舉

秋日

覽物悲搖落傷時厭亂離二毛潘岳賦三峽杜陵詩壁
潤蝸行字窗晴蟾吐絲物情還自適人事苦難期

張時

過枝江縣

近峽江逾窄推篷路轉斜丹青山外寺紅白雨中花暮
警官船鼓晨吹野戍笳亂雲千萬里何處是京華

蕭岐

入閩

自入閩中道偏諳物外情
田從山下種船向石稜行
海味空多族榕根盡倒生
連城公館好驛使遠相迎

陳鈞

題金山壁間畫

空翠忽入戶飛來何處峰
人家多傍樹僧寺不聞鐘
流水衝橋急閒雲出岫慵
何當撫琴坐願學卧遊宗

王紳

早行

孤館驚殘漏登塗竟若迷山形存隱約地勢失高低薄
曙欺殘月哀援和早雞忽聞飛瀑響已過石橋西

劉琬

自武林至丁郭舟中雜興

晚來風勢歇又見日臨曛遠岫留赧彩疎星耿薄雲波
流壁月動舟過鏡天分何處危樓上歌聲靜夜聞
寂寞空江上漁舟起暮煙明湖天際闊落日霧中圓宿
鷺毛衣潔歸鴉羽翼聯故山千里隔悵望日悽然

重到昔遊地茫然惑去塗
高原深蔓草沃野浸平湖
水闊蛟虬橫山空鳥雀呼
淒涼今古意落日片帆孤

貝翱

曉望

雞鳴雙闕曙山翠漸霏微
日映金宮上雲依玉殿飛
萬方秋貢入千騎早朝歸
自笑何為者緇塵滿素衣

王佐

戊戌客南雄

寂寞江城晚依依獨立時迴風低鴈驚返照散旌旗家
在無人問愁來只自知幾回揮涕淚忍誦北征詩

憶舍弟彥常

庭草秋仍綠江楓晚漸稀年光隨水去功業與心違遠
海猶傳箭殊方未授衣翩翩南去鴈故作一行飛

李德

寄馮朝泰

金陵昔會面一別杳無音故國秋雲合大江春水深官

情同契闊老景各侵尋縱有衡陽鴈何由寫宿心

金陵逢趙汪中

十年長契闊萬里各分飛岐路風煙杳江湖消息稀加餐俱努力訪舊各沾衣春草無勞綠王孫自不歸

立秋日登漢陽朝宗樓懷鄉中諸友

湖山興不淺而我亦淹留得罪緣微祿懷君屬早秋澹雲鄉樹遠孤月旅情幽借問衡陽鴈何時到廣州

趙介

聽雨

池草不成夢春眠聽雨聲吳蠶朝食葉漢馬夕歸營
花徑紅應滿溪橋綠漸平南園多酒伴有約候新晴

林鴻

題福山寺陳鉉讀書堂

窮經不出戶一室古珠宮燈影秋雲裏書聲晚磬中
開窗明竹雪散帙落松風料得無人到焚香對遠公

春日遊道山亭

危亭臨絕頂勝槩昔曾聞
野酌薰花氣閑心狎鳥羣
簷前看落日衣上見歸雲
半醉題詩去仙凡下界分

留別蔡秀才原

別離無遠近暫去亦傷神
正是千山雪誰悲獨往人
江空螺女夜花暗冶城春
不見同遊侶酣歌淚滿巾

塞上逢故人

五陵攜手罷足馬各天涯
出塞難為客逢君似到家
後期如夢寐前路正風沙
只好長安陌垂鞭醉落花

月夜酌別龍秀才

共向孤城別，愁爲永夜吟。
一竿滄海去，千里白鷗心。
短髮秋同老，清尊月共斟。
冶城多酒伴，遲爾寄徽音。

送周生往雷州

寧親歸未得，念子復南征。
風雨孤舟別，滄波幾日程。
絳帆辭海國，吹笛上邊城。
旅館知相憶，新秋有鴈聲。

送殷秀才之武功

送君遠行役，覲省入西秦。
五月臺江水，孤舟去國人。
蒼

山低戍壘野日暗行塵無限同遊意分攜淚滿中

早秋有述寄林八先輩

澤國風雨後貧居離索情亂蛩鳴曙井一葉落秋城薤
簞邀涼早荷衣却暑輕清冷臺下路攜手幾時行

夜泊淮陰

泊舟淮水次津樹暗蕭蕭遠火明漁舫長吟倚客簫夜
鐘聞古寺寒月照歸潮莫近啼猿處愁多夢更遙

浦源

春日旅懷

別後猶飄泊
春來倍歎嗟
花開今日少
人憶故園賒
細雨連山暝
清溪入郭斜
慈闈在何處
欲望暮雲遮

贈張潁州

迢遞浮淮泗
淒涼過潁州
水陰孤館夕
草色半城秋
才薄慙王事
吟多惜宦遊
不逢張太守
那得暫相留

和干先生

秋城黃葉下
聞笛淚沾衣
乍雨千峰出
殘陽一鳥歸
客

貧知己少鄉遠去人稀何事荆南道逢君始可依

黃玄

丹陽道中

五陵為客久儒服滿塵埃望闕無知己還鄉愧不才山
陰殘雨度河廣斷雲開歸去多朋舊春城共酒杯

河上立春

故國幾時別殊鄉今早春青陽開霽雪殘日送歸人漸
與雲霄隔空驚歲月新不堪零落處愁淚滿衣巾

周玄

春日懷海上知己

洛中無負郭渭曲久垂綸
偶值唐生笑誰憐蔡澤貧
鶯花迷去路萍梗度芳春
寥落懷知己臨風淚滿巾

九仙山期海上人不至

久闕東山賞煙蘿欲卧遲
金霞尋曉望玉樹候秋期
九鯉何曾返三花未可窺
南歸有玄鶴書此報君知

林敏

寄山中人王錫

野服逢山客，探玄輔嗣甥。
蘇門風外嘯，盤谷醉中行。
候館迷征鴈，春城過曉鶯。
佇看花落盡，思爾豁吟情。

趙迪

冬夜感懷

窮冬天地閉，積雪暗河關。
身世隨孤鴈，家林隔萬山。
江聲頻積夢，燈影對愁顏。
遙夜心千里，瀟瀟兩鬢斑。

唐泰

過黃玄之山居

半生流落意相見但依依卧病看春盡愁心對客稀砌
花飄磧戶畦藥映園扉莫怪頻來此滄洲興不違

宋禧

送友人

老去復相見別來今幾年窮鄉君再到多病我堪憐渡
水山雲薄當樓海月圓客邊愁送客頭白聽啼鵑

次韻徐性全同宿小山陳氏書樓有作

出郭天猶暖登山興獨深
雨餘初衣褐秋盡未聞砧
黃葉經過處青燈故舊心
客樓頻對榻倡和有清吟

徐尊生

松江陸氏耕隱軒

吳下陸龜蒙超然太古風
圩邊施蟹斲澤畔築牛宮
香稻三千頃高堂八十翁
隱名逃不得傳過大江東

梁寅

旅舍

寥闊山林跡淒涼
江海情巴歌從客好
楚服為人輕把
劒秋風起憂時白
髮生黃金雖所貴
未敢論縱橫

京城和蔡淵仲旅夕

卷幔迴颿入題詩
急雨催地高天喜
近雲散月還來玉
漏因寒澀金門待
曙開仙宮聞教樂
應奏上之回

對雨

飛雨山棚爽繁雲
竹巷迷翠藤低拂
石黃葉澹霑泥樹
杪盤飢鶻牆根泣
露雞園夫桔槔廢
流水滿青畦

韓奕

海雲南軒

巖內古禪居雲霞百頃餘
頻過如住近久客似來初
露竹晴簷冷松風夜閣虛
願陪賓主後終老讀殘書

曉發

忽念離家久寒江冒曉行
遠帆疑不動殘月似初生
樹密知村近霜寒覺袂輕
老來應少出訪舊獨多情

晚步

客愁思散步力疾下高堂水暖知魚樂林幽識蕙香無
風花信少不雨菜畦荒解后西鄰叟閒談到夕陽

偶意

殘雪淨園池春風動柳枝貧還存舊業身老見清時留
客嘗新酒教孫誦古詩青山頻在望思欲問歸期

次坦菴韻

乍逢雖少慰遽別又長思漫具尋山屐空歌伐木詩鶯
啼憐日暮花發笑年衰蕭散江湖興應知不可期

獨卧

高堂四壁空白首卧衰翁往事浮雲散餘生落日同早
蟬鳴柳樹晚蝶繞幽叢惟有青山色多情在望中

王履

南峰頂

搔首問青天曾聞李謫仙頓歸貪靜客飛上最高巔氣
吐鴻濛外神超太極先茅龍如可借直到五城邊

陶宗儀

金方口乃
卷五十二
南村雜賦

平生耽逸趣久矣謝浮榮計左真鳩拙形臞類鶴清晚
風谿艇釣春雨石田耕此日容衰老徜徉樂太平

屋小長林束村深四水通睡因閑處熟愁向醉時空鶯
鴨春波綠牛羊晚照紅歲輸公賦足泚筆記田功

門對山殊遠谿回路覺賒入城因買藥租地為栽花草
草杯盤數悠悠興緒嘉今年官稅急月下響綠車

編圖從入甲養子慮添丁閣筆焚三策攜鋤帶一經語

多鄰叟醉妖勝里巫靈俗薄何須較柴門盡日扃
徑微深草沒橋仄亂雲藏簷角聯漁屋籬根繫野航雨
餘晴溜碧天迴晚山蒼回首關河隔并州是故鄉

家貧田亦瘦身情禮全疎囊錦新吟藁篋藤舊著書小
童能理櫂稚子學將車何幸無榮辱長年此逸居

客分疎雨去人帶斷煙耕地曠乾坤大心閒景物清藥
材書券貫琴直典衣更歲歲西疇秫深憑送此生

池塘纔半畝浦漱走三江斷壘春煙犢疎籬夜雪厖消

搖浮晚艇寄傲倚南窗采藥鹿門遠誰能逐漢龐
遙岑浮碧漢長泖護青林地僻人家少泥融虎跡深
河南北夢風雨短長吟覽鏡憐遲暮鬢鬢雪一簪
徑竹霏香細籬花鬪色多捲簾黃犢雨把釣白鷗波
清士攜琴訪諸生載酒過有時香一篆高枕到南柯

南村後雜賦

路直華亭谷林藏處士家葵菰浮雨甲稭秫吐晴葩
埒羽肥堪縛谿鱗巨易叉客來留共酌濁酒不須賒

甲第多荒址茅茨獨老翁杖藜山遠近舟楫泖西東
草色蒹葭外秋聲絡緯中郊居端不惡此趣許誰同
槿樹成籬落松脂化茯苓閑閑籠鶴柵時過狎鷗亭
汗簡修書史持杯閱酒經塵纓終不縛何媿草堂靈

谷口蘭宜佩庭前草不薶番田栽薯蕷縛架引葡萄
杜甫十分瘦元龍一世豪賣書買農具作業豈辭勞

道陋循虛曲橋低與岸平風前松子落雨後竹姑生
向此得閒趣自來無宦情烏巾方竹杖林下一田更

江海謀生拙園田引興長徑分黃菊本池種白魚秧瘞
筆營山竈橫琴布石牀俗氛飛不到一曲水雲鄉

草徑牛羊熟雲林鳥雀馴九峰三可攬一室四無鄰世
治方為樂身安豈厭貧涼風北窗下未讓葛天民

農事年年在家常頓頓謀拾樵驅赤脚舂粟課蒼頭屋
破何曾補人生本自浮賦歸歸未得長夜夢台州

雨社來巢燕晴衙散蜜蜂蠹書魚繭實透墨麝香濃幽
夢回高枕新詩入短筇一經今白首自怪此生慵

僻壤居偏樂幽懷老自添鍊丹溫候火丸藥捲風簾雨
過魚蝦美春來筍蕨甜長年無一事治世等黃炎

元日試筆次張泉民讀書莊雜興八首

素履安吾分深居去俗嫌襟懷高莫擬材力老逾添翰
古兼行楷經明法謹嚴鶴書還赴隴光耀起幽潛

自將茨覆屋遠勝樹為巢徑曲苔花匝谿回浪影交柳
陰維釣艇竹裏構行庖我欲頻相訪談詞愧草茅

道在寧謀食時清不慮貧弟兄三俊彥天地一閒人攬

鏡菱花曉開尊竹葉春文成五色錦采采濯芳津

松樹會巢鶴溪流可浣花步鳴蒼玉珮閒鍊紫金沙揮
塵懷王衍橫琴仰瓠巴有時因客到沽酒向西家

生平甘淡薄質稟甚清通經史沈潛裏溪山笑傲中夢
游天祿閣詩寄蕊珠宮自是神仙骨塵凡迥不同

嬾騎金匱匣喜弄玉參差宇宙清寧日山林老耄時處
中知守節履正在觀頤白髮磻溪釣飛騰未可期

鄉里陳留遠才名二十餘文章宗太史詩法婉黃初避

地僑淞水誅茅結草廬功名諸弟貴問侯列華裾
構室延虛白臨書擣硬黃但祈年大有安問世炎涼首
宿堪羞饌芙蓉可集裳壽齡過八十無夢到鵷行

次姚憲僉原禮韻簡明上人古鏡

九山多勝槩此地一叢林石路循清澗茅堂枕碧岑孤
來聽說法遊衲問安心虎樹高千尺師寧不嗣音
林日遲遲靜溪雲泚泚輕雜花閒自落幽草細無名慨
我朱顏老傷情白髮明何繇前垢累問道立前榮

元宵

總說春來好春來尚寂寥江山絨媚景風雨過元宵室
白燈花燦鑪紅火力饒杯盤兒女進嬾赴北鄰招

十六夜獨酌

今夕非凡夕瑤樓影尚彌纔經一日隔未覺半分虧再
索新筍酒還賡昨賦詩舉杯邀對酌真足暢幽期

閱耕

上國曾辭聘南村且閱耕心安閒自適飢瘦老逾清趣

向琴中得詩從枕上成平生隨造物多幸見升平

簡顧秀才

地偏春自勝市遠客尤稀
草閣開清晝谿航載落暉
雜花晴簌簌輕燕晚飛飛
問訊東鄰老還容覓釣磯

南村對雨

雨氣連村白溪流觸岸渾
餘寒欺鳥雀清潤溼琴尊
修竹明如洗長楊翠作屯
草堂初睡起曳履掩柴門

九月朔日庭前白菊開花

尋常重九日難得菊花開
今歲因添閨孤芳亦借魁翠
裘雲掩冉鶴羽雪瑤璫
三嗅秋香立吟哦待酒來

十月廿六日喜雪分韻得同字

今年方見雪歡喜萬人同
觥巨醅浮綠窗明燭耀紅
煎茶移石鼎理棹命谿童
黃竹何須賦休祥兆歲豐

庚辰元日

授歷紀庚辰開元值丙寅
五更微見雪兩日便迎春
頭戴銀旛巧門題彩帖
新屠蘇循故事殿飲老年人

二月朔夜中雷始發聲三日寒載嚴雪大作

前夜起雷聲寒威刃發硯積陰春黯慘密雪晝飄零香
褪梅腮白愁緘柳眼青擁鑪頻熾火不似肉為屏

西湖紀興

浩浩春波闊冥冥夜雨縣笙歌傳別館燈火隔疎煙作
客頻遷次傷時更可憐明朝晴未卜還是醉湖船

沈夢麟

野航

一室淨無塵門通畫舫鄰若分鷗鷺席能受兩三人江
水家家綠溪花岼岼春杜陵貪佛日隨意賦詩頻

劉仔肩

春日與李二文學遊城南

浩蕩關河遠周流歲月新獨醒愁對酒多病怕逢春楊
柳南城路鶯花紫陌塵若為聯騎出為爾謫仙人

公子

玉雪諸公子聯翩出鳳城柳橫絲障綠花擁繡衣明玉

勒迴香騎金丸落小鶯晚酣邀上客歌吹向蓬瀛

別墅晚晴與鄰叟久立

郊原初雨歇散步出荆扉落日在高樹涼風生客衣佛
香僧舍近江影塞鴻飛亦有南鄰叟忘言相與歸

易恆

次沈生江村韻

一徑漁樵外孤亭水樹間池春芳草合庭午落花閒僧
為徵詩至兒因貰酒還卷簾看野色微日下柴關

王沂

過臨江訪彭聲之

金鳳洲邊路維舟重憶君江虛秋氣入沙淨曙光分
斷鴈前汀起鳴鐘隔岸聞因過鑑池上詩思亂愁雲

小莊道中

客路千厓裏春風二月中虎蹄荒徑少鶯語故鄉同澗
水縈迴綠山花自在紅物華空滿眼去意只怱怱

逢昶

遊廣東清遠峽山寺

寂寂長林下僧房鎖碧苔
樹枝猿挂折花片鳥銜來
池溢流過水爐存藝後灰
賦詩殊未就徙倚故遲回

登浪穹縣護民寺

浪穹西阜寺獨眺有餘情
落日秋山色西風古樹聲
征衣憐舊弊客路喜新晴
洗鉢焚香事誰能了此生

古淵房閑書和韻

禪房碧樹深坐久語幽禽
葉罅日穿透林端雲過陰
筆

新微蘸墨書故少生蟬僧有思鄉者時時亦起吟

簡澤雨田

花時曾惜別菊候又相逢落日深山道清風古寺鐘往
來非定跡彼此是衰容何日隨師去棲禪共竹松

梁蘭

荆湘道中

江入瀟湘近山連楚塞高兩厓如積鐵一水不容舠慣
客寧辭遠藏身豈憚勞同門多宦達漂泊媿吾曹

書臺書懷

九阜晴初見雙江雨合流
泉聲偏近枕獵火自明樓
亦有杯中物應無客外愁
生涯隨泛梗未擬棹歸舟

陳緝

和大兄八月十四夜月

桂老金為粟蟾孤玉作團
明朝應更好此夜不勝寒
弟妹他鄉共關山幾處看
南飛有烏鵲未得一枝安

鄭杕

懷宋學士

亦知離別遠喪亂近何如
流水天涯路征鴻塞外書
縣飛雪晚點點落梅初
日月重回首那堪已歲除

章閭

送張二貢士

煙靄散春晴亂鴉深樹鳴
千山懸落日一騎出孤城
急管催離宴飛花惱客情
殷勤懷上策謁帝向承明

王超

張緒歸舟

落日半帆收，張溪古渡頭。
花明汀樹雪，香冷渚蓮秋。
碧浪搖檣影，青山枕舵樓。
曾知風景好，記此一停舟。

徐文舉

賦得百花洲

春花迷繡幄，春水漾金鳧。
照影和明月，流香過石湖。
錦帆應不見，沙鳥自相呼。
感舊復傷別，愁傾雙玉壺。

顧協

陪周處士訪西林上人

偶陪周處士來訪白雲居
借筆抄僧偈焚香看佛書
林疎松露鶴池冷藻藏魚
悟得閑邊趣勞生總未如

喜真菴上人見訪

幾時離隱處拋却舊煙霞
舟卧寒江雪村行晚徑沙
送泉來野館看鶴到鄰家
興盡思歸去青山樹裏斜

枕上偶成

聽盡城南漏依微向曙天
雞鳴疎雨外月落斷鐘前
處

世無良策謀生欠薄田
花時可行樂底事獨愁眠

陶琛

題江參長江圖

石出夜潮落山明寒霧消
江空千里櫂村迴一歸樵
樹色連沙嶼人家傍野橋
還同舊樓地風景日蕭蕭

史謹

過七星關

萬里投南徼層關度七星
嶺雲和瘴黑木葉向冬青
路

遠家難問愁多酒易醒相逢但樵牧何以慰飄零

徐基

寧海道中

中歲事行役勞生卒未休大星垂野白遠水際天流
土俗魚鹽富民居橘柚稠何年謝塵鞅歸卧此林丘

方孝儒

歲暮寄王脩德先生

杪歲垂垂盡寒花悄悄繁律回春有信冰動水生痕
樸

學慙經濟窮居廢討論都將百年意一笑付乾坤

我署縣曉發次韻

渡水籃輿穩穿林草徑微勝遊方外得樂事世間稀風
過歌僧笠雲來挂道衣山林應久待好去莫相違

題畫

得意支郎畫分明是米家亂雲浮雜樹遠渡卧枯槎白
屋孤舟迴丹崖一徑斜何時共漁叟洞口訪桃花

程本立

橫湖

橫湖如匹練風景此中稀日暖赤鱗躍天晴白鳥飛寒
松蟠石岸春水沒苔磯幾度斜陽晚漁舟渡口歸

題李典儀雲東卷

母老今猶健兒行久不歸一官淹白首萬里夢斑衣越
郡東溟闊秦關西日微只將雙淚眼日日看雲飛

許州東屯雜詩

農功將築圃使者正行田車過聞牛鐸詩成隨馬鞭涼

風蘋末起落日樹頭圓
翻憶吳淞岸菱歌處處船

過嶠甸始見禾泥蠻數家有吏攜酒過水見土
酋飲道傍僕從皆飲酒盡乃行有作

山斷村纔見溪迴路欲迷
販茶非土獠勸酒是禾泥
碧樹排雲直青秧插水齊
欲忘鄉土念多事子規啼

晚至晉寧州

落日孤城小輕煙一水斜
青山蒙氏嶮綠樹棘人家
絕塞無來鴈荒城有噪鴉
多情北州尹勸酒說京華

茅大方

行營漫興

壯地得春晚蕭關積雪多風雲驅部伍旄纛徧山河羌
笛翻邊調秦兵雜楚歌漢家飛將在不必問廉頗

劉璉

題深上人松月軒

夜月明松頂軒居不掩扉石泉沈湮翠碧瓦弄晴暉林
靜猿初息巢空鶴未歸此中凝坐者寒沁薜蘿衣

高遜志

龍江紀事

避地龍江上扁舟似杜陵
流離心欲折漂泊力難勝
水落橫魚畧林疎見寺燈
窮塗何所託猶喜耦良朋

鄭桓

次韻方希直

闕下知名久相逢值暮春
才華曾動主議論每過人
漢水元通蜀台山亦近閩
何時江海上尊酒話西秦

唐之漳

元夕東池上作

未老只傷離春霜著鬢絲纔過拜年日又屬放燈時頭
重生憎酒心閒熟品詩此身萍葉似漂泊偶東池

元夕次孟熙韻

今夜越王臺蓮花匝地開星河低蠟炬歌管散銀杯水
向銅龍滴香從粉妓來遙憐多病客江館詠寒梅

解縉

彭澤

青山圍一縣隱隱見人家亂石邊江出孤帆帶日斜翠
添官舍柳香泛驛樓花不見陶彭澤湓城起暮鴉

楊士奇

聞角

風靜周廬夕營門角起愁不須三弄徹對月淚先流楊
柳飄還合梅花落未休鄉心已無限況復在邊州

送給事中姚山赴河南僉憲

觀風在激揚今喜擢蘇章袖有銀臺筆衣含玉殿香
河流明憲節嵩嶽對公堂想見澄清日歌聲滿洛陽

送胡元節廣西憲使

驄馬赤茸鞦臨岐嘶未休朝廷用儒雅風紀得才猷
天遠三湘外霜含八桂秋貪漁嗟薄俗表率在名流

答黃宗載

又是三年別新來百感增薰蕕安可問枘鑿苦難勝
白髮落垂盡青山歸未能故人贈佳句擬報玉壺冰

楊榮

鑑湖一曲為史院判題

見說山陰道湖光一鏡秋
遠含晴日動迴帶晚煙浮
花發連堤樹帆飛隔浦舟
橫塘空有夢未許賦歸林

胡廣

重陪駕至太液池

玉砌臨無地飛甍上倚天
微風斜舞燕高柳沸鳴蟬
芳草茸茸細池荷箇箇圓
孰知丹禁裏別有好林泉

金幼孜

早發清河

海色正蒼涼，龍旂拂曙光。
雕戈寒映日，羽箭薄凝霜。
城闕雲中近，關山笛裏長。
天兵隨殺氣，萬里埽欃槍。

次懷來

羽檄通宵急，行宮出每遲。
漏聲催鼓角，月影上旌旗。
風逐天香近，星隨斗枋移。
中軍嚴宿衛，傳警盡熊羆。

早發興和

未曉戒嚴程鳴弓度塞城川雲隨地起野火雜星明虎
旅聽笳動鑾旗傍蹕行草青沙路軟渾覺馬蹄輕

李至剛

朱澤民秀野軒

幽居遠城郭寂寞自成村野色還通市春潮直到門竹
窗晴曬藥花塢晚開尊想象其中趣何由得具論

黃福

過武昌

城頭黃鶴樓城外鸚鵡洲
觚稜出漢表葭莢分江流
樓棟白雲暮接天芳草秋
我來吟不盡沽酒載行舟

陳璉

得家書聞舍弟琦來京喜而有賦

偶得鄉人至今秋道爾來家書千里發懷抱
一時開準擬同聯句安排共舉杯從今思更切
頻上鳳凰臺

多景樓

獨倚闌干久涼風滿我衣
樹從京口斷山到海門
稀鴈

影橫秋色蟬聲送夕暉
蕪城纔咫尺樓堞望中微

胡儼

久雨喜晴明日立夏

一月厭雨聲忽逢今日晴
春從花上去風過竹間清
睡美新茶熟身閑野服輕
近來多坦率客至倦逢迎

春興

門外草萋萋東西路欲迷
鶯捎穿樹蝶燕拾落花泥深
翠籠長薄流雲度碧溪
獨攜筇竹杖不覺過橋西

吳溥

寄宋子環

聖恩寬逐客不遣過輪臺
談笑潼關去雲霞仙掌開
故鄉深念汝遠道竟能來
明日相思處高秋鴻鴈回

王璣

述懷

三十未得志栖栖無所投
空持五經笥不遂一身謀
土蝕張華劍塵生蘇子裘
何如覓歸計負郭有田疇

王洪

奉和胡學士侍遊萬歲山

飛旆臨丹壑鳴鑣陟紫臺日邊雙鳳下雲裏六龍來寶
殿臨空敞瑤筵就水開共誇青瑣客陪宴柏梁回

送金生歸江南

朔雲千萬里歸興復如何鴻鴈雨中去蒹葭霜後多人
煙投遠戍驛路出長河惆悵東橋別涼風起暮波

送廖訓導

客路臘初盡河橋冰向開
言辭故人去遙逐早春回
江館低煙柳山郵發野梅
懸知問字者正憶子雲才

李郎中粉署餘清卷

鳴珮趨丹闕焚香坐粉闌
禁城鐘鼓靜人吏簡書稀
幽鳥鳴高樹涼風動紫薇
明時仍宦達誰不羨恩輝

王偁

楊秀才幽居

楊子幽居處開窗面遠空
水喧明鏡裏雲落畫屏中
捲

慢留山月揮絃送晚鴻何人問奇字載酒野橋東

賦得邊城雪送行人胡敬使靈武

萬里燉煌道三春雪未晴送君走馬去遙似踏花行度
磧迷沙遠臨關訝月明故鄉飛鴈絕相送若為情

賦得花影

欲拂更紛紛空香寂不聞亂迷芳蝶夢輕護錦苔紋襯
月籠書幌因風颺舞袞莫移庭下步蹴碎一階雲

送沙子進赴祿州別駕

客舍酒初香都門柳色黃一官仍別駕萬里赴炎荒江
路猿聲早山城榕葉涼遠人勞撫字且勿厭殊方

送李校尉致仕還江左

雄劍委龍鳴關河白髮生功成百戰後老去一身輕夜
月桓伊笛秋風驃騎營燕歌何處寫曲罷有餘情

邕州

五管推名郡雙江接上游人家蠻霧曉山雨瘴煙秋遠
客誰青眼殊方易白頭今宵南極外分野望牽牛

王恭

寒村訪隱者

谷口微霜度寒村獨見君西風正蕭索落葉不堪聞古
路無行客閒門有白雲為憐幽處好不忍便離羣

梅江送林澤中還嶼南

賣藥偏成隱相逢但布衣梅江秋外別花嶼雨中歸遠
火千峰夕遙鐘獨鴈飛自言今白首此去故人稀

客中見新燕

可憐江上燕幾日到烏衣欲向誰家去多應舊主非落
花深巷小喬木畫梁稀自笑天涯別秋風想未歸

江樓聞笛

纖月挂風林晴樓覆夕陰誰家吹鳳管永夜作龍吟楊
柳邊頭恨梅花笛裏心天明漢江上惟見水雲深

書江山別意圖送羽人還神樂觀

羽人何處去歸事玉宸君飛珮花間別橫簫鶴上聞過
關閩樹斲挂席楚江分想到齋宮夕圓丘候五雲

王褒

題綠柳紫燕圖

綠柳夏依依，差池玄鳥飛。
蹴花隨別騎，銜絮點征衣。
隋渚晴煙暝，章臺夕照微。
衡門相托久，應傍主人歸。

陳亮

晚春閒思

門巷客來稀，閒居靜掩扉。
微風花自落，細雨燕雙飛。
向曉披遺帙，迎暄換袷衣。
年年此時節，惆悵送春歸。

王紱

夜宿黃牛峽

煙景暮蕭森，黃牛峽轉深。
灘聲孤棹月，山影半江陰。
感慨追陳跡，登臨愜壯心。
倚篷眠未得，何處又猿吟。

寄包徵士公愷

愛爾閒情好，林堂白晝長。
楷書臨小晉，近體學中唐。
水蒔一池芡，園栽十畝桑。
不知籬下菊，秋後肯分香。

題老圃卷

桑榆宜晚境築圃近茅堂鑿沼分流水編籬補壞牆雨
晴瓜蔓綠風暖菜花香客過饕雞黍村醪剪韭嘗

寄孫景昭

每愛孫公子風情不可禁留賓開博具呼妓合胡琴杯
泛忘形酒囊存買笑金別來嗟已久綠髯雪應侵

送黃仲遜之安平鎮巡檢

聞說安平鎮荆湖當要關瀟湘合二水衡霍拱千山地
僻居民少時清邏卒閒遙知到官後多在醉吟間

暇日讀楞嚴經偶成

勞生何擾擾衰髯已蕭蕭
偶得楞嚴讀都將世慮消
水流虛谷靜雲度碧天遙
獨坐忘言久西樓對寂寥

錢仲益

錢達可山房

苦憶錢夫子幽居嵒崿山
問梅殘雪外采藥亂雲間
塵暗芸籤冷香銷蕙帳閒
斷腸泉上月依舊照松關

梁潛

合州寫懷

忘却儒官冷誰為蜀道吟
一身猶長物萬事豈關心
水鳥窺魚立山雲帶雨沈
人生聊適意莫受旅愁侵

水合交層浪峰回出翠鬟
雲隨村艇去鷗趁波還
斗酒相忘甚寸心如此閑
不應篷底醉過却釣魚山

虞謙

閒居

蜜熟黃蜂靜泥融紫燕忙
日停花妥豔風過竹生香
美

景追遊少中年感慨長一尊消晚坐乘月更移牀

田家晚泊

風磴翻危葉霜槐出斷根過橋逢野老倚杖候柴門
馴犬熟迎客歸鴉遠認村茅簷投晚泊煙霧斂初昏

陳繼

秋夜雨中懷孟端

愁雲接地陰城漏更沉沉寒雨驚秋盡殘燈入夜深
淒涼千里客惆悵百年心誰料分攜後防邊直到今

沐僖

和郊居韻

山勢青連野川光白映沙東風遙見草小雨半開花門
送攜琴客橋通賣酒家徜徉遊物外隨意樂年華

曾榮

淮南舟中

遠戍雞聲曉遙堤柳色濃斷雲京口樹殘月廣陵鐘簫
鼓官船發圖書御寶封朝臣多扈從冠佩日相逢

駕發臨城

雞鳴寒漏徹車駕發臨城殘月千山曙浮沙一路平雲
光隨鳳輦露氣溼霓旌馬上頻回首猶看燎大明

涿鹿道中

遠樹孤城出高原四望遙山從平地起雪到暮春消細
草承雕輦垂楊拂御橋愁連易水上風色正蕭蕭

銅城

野燒荒原外寒雲大澤中馬嘶知驛近駝吼欲生風碧

草沙堤出紅橋澗水通遙看行殿近旗影夕陽紅

送僧歸日本

南遊歸舊國東去海溟溟積水天邊白連山島外青春
帆向日去夜梵有龍聽杳靄知何處疎鐘隔遠汀

阜城道中

曉渡滹沱水旌旗夾路長風喧疑作雨霧重不成霜仙
樂隨行輦宮袍惹御香謏才叨扈從謾擬賦長楊

靜海逢刑部主事侯福留觀音寺宿賦此贈別

皇華千里外何意此相逢水郭春光早郵亭柳色濃偶
回牛渚棹來聽虎溪鐘明發孤舟別相思隔幾重

新秋有懷和時彥韻

天外涼風起浮雲似水流銀河初轉夕珠斗迴移秋凱
奏邊城淨寒驚旅客愁人情同社燕休戀異鄉樓

牡丹燈


剪綵製姚黃根株異洛陽銀燈添國色寶篆借天香富
貴同金谷光輝到玉堂不須勞羯鼓爛漫過年芳

早發阜城

霜薄曉寒輕
揮鞭出阜城
金吾收後隊
驃騎布前營
夾道天香散
連村火炬明
塵沙隨處起
奈此朔風行



御選明詩卷五十二



總校官庶吉士臣侍朝

校對官檢討臣蕭九成

謄錄監生臣李本

欽定四庫全書薈要

集部

御選明詩卷五十三

詳校官原任主事

臣

李斯咏

欽定四庫全書薈要卷一萬八千五百五十三

集部

御選明詩卷五十三

五言律詩四

周述

賜觀燈詩

今夕逢元夕歡聲遍九垓
星臨銀漢動月傍碧空來
紫禁千花繞金門五夜開
聖情同宴賞玉漏不須催

寄楊顯道先生

我憶楊夫子風流似昔人素琴長對月白髮不憂貧彭
澤陶元亮稽山賀季真相思欲相見烟樹幾回春

周孟簡

丙午除夕

為客逢今夕寧親憶去年一尊終不醉孤館自無眠家
在雲山外身依日月邊何堪雙鬢改又值歲華遷

陳敬宗

元夕賜觀燈應制

皓月金門夜和風玉殿春雲移三島近燈簇萬花新天
仗臨丹宸星橋接紫宸中官宣德意宴賞及羣臣

紫禁疎鐘靜高城刻漏傳五雲迎寶蓋萬戶綴金蓮瓊
醴行仙席龍盤進御筵教坊呈百戲齊過玉階前

紫陌連清禁彤樓接絳河九門星彩動萬井月華多寶
炬通宵晃鸞笙協氣和臣民涵聖澤齊唱太平歌

山擁金鰲壯雲盤綵鳳來星河隨斗轉珠闕倚天開歡
洽春聲徧恩從淑氣回願歌魚藻咏長奉萬年杯

王英

扈從晚宿夾溝

初雨過符離雲霞望欲迷垂鞭信馬去傍輦聽鶯啼山
繞行營外溪迴帳殿西夜深聞鼓角天近月華低

贈伍子正還巖山舊隱

積翠羣峰出盤雲古洞深澗花春帶雨山木晚澄陰猿
鶴多年別江湖萬里心還攜謝安妓歸去一登臨

挹秀軒

勝地風煙外邊山紫翠分花飄萬壑雨簾捲半溪雲鶴
語林間聽樵歌谷口聞不妨招鄭老對酒夜論文

酬王尊師仙遊

翠水三山路微茫見十洲月臨珠斗迴雲度絳河流露
氣生鰲背簫聲出鳳樓慙無學仙分得伴赤松遊

題龍氏龍州書館

幽居如杜曲松竹舊時栽溪路隨花入柴門傍水開風
來書帙散月出棹歌回還共王喬輩吹簫坐紫苔

秋初有懷呈曾侍講彭脩撰二公

律應清商動涼生大火流梧飄金井露雁度玉門秋爽
氣消殘暑砧聲報遠愁佳期七夕近乘月却登樓

王直

過曲江

稍稍滄江曲亭亭日向低舟人方利涉客子未安栖度
鳥衝山帶飛鳧踏水梯引杯觀物性不惜醉如泥

端午日觀打球射柳應制

玉勒千金馬，琱文七寶毬。
鞚飛驚電掣，仗奮覺星流。
欸過成三捷，歡傳第一籌。
慶雲隨逸足，繚繞殿東頭。
楊柳綠含滋，琯弓縱射時。
向風飛白羽，和露折青絲。
輦路晴光動，旌門午漏遲。
營前搥鼓急，捷報萬人知。

村居

古岸輕煙外，深林夕照邊。
疎籬孤徑窈，茅屋數家連。
花暝流鶯歇，沙平乳犢眠。
桑麻青滿眼，幽思頗相牽。

雪

大雪下龍墀蓬萊曙色移光通九華殿花滿萬年枝賦
擬梁園作歌憐郢曲詞西山臨魏闕相對玉參差

月下對酒

萬里浮雲盡孤城畫角殘月從今夜滿人在異鄉看隱
隱關山遠淒淒風露寒客愁難為減應賴酒杯寬

得兄行敏書知在臨清將北上

嶺外三年別天涯萬里迴書從今日到船向幾時開落
日關山遠清秋鴻雁來重陽看漸近同醉菊花杯

雨

野迴雲容黑汀長雨氣寒春隨花片減愁向酒杯寬亂
水通流急孤舟逆上難白鷗渾自得來往任風湍

周忱

尋天台李道士齋

瑤草迷行徑丹臺近赤城山川遙在望雞犬不聞聲谷
靜松花落橋橫澗水鳴雲間雙鶴下疑聽紫鸞笙

送孫大尹赴嶺南

尊酒三山別，雙鳬五嶺過。
和風吹客袂，啼鳥雜離歌。
雨洗炎方樹，霜清瘴海波。
宦遊知獨好，春色向南多。

李昌祺

宿端壁寺

遺構象王宮，荒涼小邑東。
一燈秋殿閉，孤榻夜窓空。
飢噉牀頭鼠，愁吟砌下蛩。
蕭蕭黃葉墜，庭樹顫西風。

早發小孤山遇風

湖盡江逾闊，舟窮路若迷。
垂楊春寂寂，芳草雨淒淒。
旋

水電鼉窟平沙雁驚堤風波隨地有何處可幽棲

送人南歸

年年長作客北薊復南京秋雨滄洲雁春風采石鶯好
山環故里流水背孤城去住無拘繫閒身到處輕

喜張進士叔豫見宿旅舍

窮巷寂無鄰青燈共故人遠聲霜下磬孤影客邊身露
冷蛩相弔庭寒月自親殷勤一瓢酒更與話酸辛

送陳生歸吉水赤岸

清砧兼落葉總是別離情去路千程遠歸舟一葉輕秋
雲連樹暗寒日映川明亦有滄浪興何時共濯纓

送周秀才遊長沙

迢遞長沙道蕭條歲晏遊亂山黃葉寺孤棹白蘋洲夕
鳥衝船過寒波背郭流毋論卑暑地賈傳昔曾留

宿廢普濟寺

青山行欲盡深樹見僧房雲氣千峰暝秋聲一院涼長
藤懸破衲脫葉覆空廊龍象黃金地蕭蕭蔓草長

三月四日即景

忽忽春將暮俄過三月三
草誰憐益母花自媚宜男乍
到尋巢燕初眠上箔蠶新茶與稚笋鄉味憶江南

新野即景

村暗濛濛雨流渾淺淺溪
菊花長帶濕豆莢半沾泥野
迴居民少林昏去路迷自投新野界蒿草與人齊

魏驥

十二月九日喜晴

林屋春來近和風曉入簾玉梅開的的膏雨灑纖纖地
暖草將茁冰消水若添東君策義馭靈鵲噪晴簷

久不過樂丘賦以識吾之戀戀耳

閒居清晝永憶昨過閑行月上湖光瑩雲收山氣清開
尊方盡醉回首更留情便欲移家去悠悠樂此生

一逕紆山麓扶藜款款行塵心隨地遠野趣入詩清弔
古傷遺跡尋幽愜素情歸途度柴嶺又喜月初生

循山宜步入傍水可舟行雞犬緣村靜松篁著處清巖

僧無怪說野老有真情便是桃源裏移居可樂生

十月十二日夜步月

杖策紆苔逕清吟月正中隔林燈火近入望水雲空夜
靜無過客風高有斷鴻徘徊來復往此趣許誰同

春陰

屈指三春盡都能幾日晴遠山連樹暝新漲與堤平處
處鳩將乳家家蠶欲生越王臺下路阻却看花行

題竹

林立曉蒼蒼琅玕宿鳳凰
孫枝凝露密稚子過人長
搖月清聲細當風粉節香
敲門有佳客日日看無妨

不寐

展轉孤吟處匡牀入夜深
地偏人跡杳風迴漏聲沈
釋悶聊成句何勞見賞音
寒梅香忽度知即是同心

柯暹

九日次黃學士韻

客途逢九日景物為誰賒
此地已無酒故園空有花
翠

微亭下路采石驛邊槎未卜重過日臨風獨歎嗟

陳全

送人尹江右

窮冬正蕭索離思苦匆匆風雨孤帆別琴尊幾日同雪
晴淮水急雲盡楚天空花縣絃歌暇題詩寄塞鴻
片雨江村外霏霏暗去程輕沾芳草濕遠入斷烟輕歸
鳥愁邊沒離情別後生不堪凝望處迢遞失關城

熊際

雨後江行

早出餘杭郭微茫曉色開
畫船江上別綠樹水邊迴
酒為離人勸詩因細雨催
故人凋謝久惆悵不勝哀

陳循

過徐州迴鑾處

偶得迴鑾處遙因想翠華
彩雲飛輦路象跡印汀沙
曉日彭城地春風楊柳花
獨慙隨使節重此泛仙槎

沛縣

漢祖歌風處荒臺宿草迷野雲連碣北溪雨過豐西人
自殊方至書因去客題鵠原千里隔落筆數行啼

高穀

送倪廷用致政歸嘉興

青雲遺宦轍白首賦歸田舊著宮袍卸新裁野服便草
堂留月色花徑隔塵緣陶令門前柳春來好繫船

鄭珞

送高時旭還閩

祖帳連芳草征帆挂夕曛鄉心閩海月客夢楚江雲候
館雞聲早平沙雁影分懸知霄漢上早晚薦雄文

周敘

春日扈駕謁陵

御幄千旗擁屯營萬騎環祥煙隨鳳蹕瑞日映龍顏金
鼓轅門樂衣冠綵仗班嵩呼來父老聲動五雲間
撫撫神臯迴鑾輿曉駐時天連雙鳳闕地近九龍池日
月開黃道雲霞翊畫旂澤隨陽德布春滿萬年枝

送袁欽誠

少壯辭家去從師千里遊
雨深廬岳樹天接漢江流
夜誦分漁火朝吟倚客舟
遙知重會日春滿帝王州

劉鉉

題叔明靈石草堂圖

坐深殘醉醒簾捲草堂開
擁坐千峰出橫空一鶴來
晚風松落子時雨石生苔
却憶山中客披圖日幾迴

薛瑄

武陵曉泛

今朝風日好來泛武陵溪碧水寒依岸蒼林遠護堤沙
光搖野馬人語散鳬鷺二月桃花發還應處處迷

晚至雲夢

雲夢行看近肩輿趁晚涼稻塍新穗吐蓮沼落紅香密
樹隱茅屋蕪堤繫野航霜臺絕瀟灑容我得徜徉

大江逢霽景獨酌有感

舟行逢霽景逸興杳難羣綠樹江邊影青天水底雲衆

山連復斷雙艣合還分自酌金尊酒微吟到半醺

舟發城陵磯

急鼓催舟發依稀見岳陽遠波浮島嶼衆水合岷湘竹
瓦居人閤杉牌賈客房且看風景異未覺遠遊傷

湘江道中

湘鄉南去路連日是山行地僻溪潭綠冬和草樹榮野
人懸稻把古戍列麾旌異俗今如此歸當話友生

喬口溯流往長沙

楚岫無邊翠湘流不盡清香蘭屈子賦苦竹鷓鴣聲風
景常年事雲霞萬古情沙頭舊鷗鳥誰肯與尋盟

武口守風

歸思方正切北風何太狂江村平隱見湖樹遠微茫浪
起魚龍伏天低鶴鵲翔貂裘思更著秋雨早生涼
繫舟楊柳驛風雨苦連朝遠岫煙埋樹荒村水沒橋年
華身老大湖海興蕭條天意何留滯應憐望國遙

嘉陵泛江

湛湛嘉陵水沈沈石底明岸翻雲樹影谷響棹歌聲微
冷南風細輕陰暮雨晴應難逢此景還慰遠遊情

樵雲野老

自得山中趣都忘世上名閒尋肥遯侶共作斫雲行決
決溪流響丁丁谷應聲偶然值漁者問荅有深情

于謙

暑月將自太行巡汴

三晉衝寒到中州冒暑回山川元不改節候自相催綠

樹連天暗丹葵向日開
太行雲縹緲搔首意徘徊

遊春

滿路香塵起尋春思欲迷
樹晴鶯出谷溪暖燕銜泥
玉勒嘶芳草青樓瞰大堤
風光無限好都在畫橋西

春日大風感懷

遠塞足風沙春深不見花
層冰猶度馬弱柳未藏鴉
易醉愁邊酒頻歸夢裏家
凭闌一搔首心緒亂如麻

太行途中雜咏

碗子城邊路年來幾度過山川認行色花鳥熟鳴珂戀
闕情何限瞻雲思轉多壯懷成激烈彈劒欲高歌

到澤州

信馬天將暮離山路轉平川紫太行驛樹繞澤州城落
日翻旗影長風送鼓聲孤雲在天際回首若為情

春日客中漫興

客懷雖寂寞春意自堪憐草色翠如織花枝紅欲燃鳴
鳩疎雨後啼鳩暖風前翹首天涯路韶光又一年

客途春陰

薄雲和日色底事弄陰晴駐馬空回首鳴鳩不住聲東
風吹野草暮靄起山城擾擾長途倦逢人即問程

偶桓

歲暮

忽忽歲云暮朔風吹客衣却因鄉井近轉覺信音稀山
響鼙鼙嘯江空鶴鶴飛百年渾潦倒底事未能歸

郭厓

送友之京

我正愁寥落君今又壯遷
春歸萬里外人去五雲邊
塞柳迎征旆江花照別筵
離情不可道去住各悽然

施敬

送人還廣陵

會晤情方洽睽違意更長
天涯同是客秋杪各還鄉
黃葉飛揚子青山繞夜郎
分襟卽萬里相顧兩茫茫

劉叔讓

憶弟

漂泊嗟吾老，羈遲見汝難。
西風鴻雁急，落日鵲鴿寒。
渭北書長絕，滇南淚不乾。
相思朝夕夢，懷抱幾時寬。

李悌謙

春社

今日報春社，風光處處同。
社公三日雨，花信幾番風。
野老還祈穀，村醪可治聾。
醉歸茅屋卧，花月淡朦朧。

劉績

清夜西窓獨坐有懷

杯罄燭花殘沈沈夜向闌吟兼鄰笛怨坐怯客氊寒
露蕙蟲爭緝風枝鳥畏彈未能消俠氣時拭劒鐔看

送周興化還郡

中朝人共說未見已相知此別又千里再逢還幾時
雨來崖樹暗風靜浪花遲歸到公堂裏停雲合賦詩

送友人歸番陽

芳草綠尚淺故園春又殘平生為客慣今日別君難
短

棹吳郎曲哀絃楚女彈江花正滿眼且莫下長干

送王內敬重戍遼海

別淚不可忍杯行到手空風塵重作客寒暑易成翁曙
色連關樹秋聲起塞鴻天涯見親友還與故園同

鄭嘉

秋日懷孟熙先生

故人丘壑隱塵路往來遲寒暑空相憶雲山不可期古
碑梅福寺荒井石郎祠舊日同遊處偏勞入夢思

董儒

四明夜泊

孤城臨野戍，短棹倚江橋。
客路辭家久，親闈入望遙。
斷雲晴後樹，明月夜深潮。
感此無窮恨，令人倍寂寥。

廖駒

思親

戎馬何時歇，奔馳倦此身。
青燈孤館客，白髮倚門人。
書信連年絕，家山入夢頻。
歸來未有日，回首一沾巾。

朱純

登龕山

長江限吳越形勢一何雄
夸島蒼茫外乾坤浩蕩中
江連埋日霧汀暗走沙風
忽起乘桴歎滄洲不可窮

湖上

寥落暮天迴蒼茫湖水平
秋雲開雁路涼雨靜蟬聲
坐石忘收釣臨流愛濯纓
自緣耽野趣不是為逃名

賀言

題燕穆之楚江秋曉圖

月落楚江空
秋林待日紅
船開飛葉雨
人渡長潮風
閣影濤聲外
山形曙色中
神仙問何在
有路想難通

咏殘花

滿架開初盡
唯留幾許春
輕風南陌上
落日暮江濱
影淡簾櫳月
香消輦路塵
漂零莫飛去
別院有愁人

高壁

秋日逆旅送友人

七澤波濤險三邊道路窮生涯同泛梗踪跡歎飛蓬晚
色平蕪外秋聲落木中毋將衰颯淚臨別灑西風

沐璘

送人

花柳正芬芳天涯去路長陌塵輕作霧澗草細生香舟
楫通巫峽山河拱建康南遊嗟我久送爾倍思鄉

滇南即事二首

自昔梁州域西南路盡通碧雞名岫遠金馬故關雄羅

婦裙花布蒲蠻臂
柘弓聖恩同覆載
處處樂時豐
萬山藏古砦
六詔雜諸蠻
焚女頭籠帽
番僧耳墜鏤
啖蛇傳土俗
屠犬祀神姦
更有西戎種
輕生性最頑

潘亭

北固晚眺

極目蒹葭外
西風白苧涼
殘霞隨野鷺
落日送帆樯
水接蓬萊近
山連楚越長
六朝遺恨在
誰為管興亡

七里灘

怒濤催遠客帆落釣臺陰夜雨他鄉夢秋風何處砧渚
煙籠樹杪澗水入溪深中有垂綸者茫茫不可尋

蟋蟀

愁對燈前影時聞牀下聲要知因物付何用不平鳴斷
續許多意淒涼無限情誰家急砧杵海內已休兵

岑琬

松陵道中

野闊煙凝樹湖深水近田了鬢挑菜女獨櫓賣魚船鳥

去青山外帆收古驛前孤吟看北斗戀闕竟忘眠

秦旭

雨齋簡惟清

瀏瀏竹間雨瀟瀟窓外鳴小池收暑氣疎柳作秋聲鬢
雪蒙頭冷腰金照眼明年光太匆迫何處學長生

高得暘

雅集分韻

帝里春風早金河凍雪消暗黃初著柳新綠已平橋東

閣情何限西園景倍饒
朋簪喜相盍歌咏樂清朝

春夜次韻

柳葉蛾看綠花枝粉臉紅
金鬟籠細霧繡幕護香風
夜氣三更後春光二月中
梨雲隨蜨夢來往繞簾櫳

胡粹中

昨夜

昨夜霜初重他方葉又黃
蛩聲悲月冷客意怯風涼
孤嶼漁村外荒郵野戍傍
因思舊遊處魚稻滿江鄉

唐子儀

泊雷港

晚泊豁吟緒行行步渚沙雨添新柳耳水減嫩蒲芽烏
鬼來漁艇青蚨付酒家微風吹短褐倚杖數歸鴉

林文

秋景

水已澄秋色峰看淡落暉雁投寒渚下漁逐暮潮歸古
寺初鳴磬孤城半掩扉行人從喚渡舟子去如飛

王誼

秋日懷孟熙先生

倏忽成遠別幽栖仍薜蘿
草芳經雨歇蟲響入秋多
夜月柯亭市涼風鏡外波
相期盡一醉何日重經過

初秋

片雨曉初過青桐隕素柯
客衣身上薄鄉淚枕邊多
水落牽牛渚機催織女梭
玉門班定遠歸興欲如何

劉珏

寄傲園小景十幅倣盧鴻一草堂圖詩自題

錄四首

螺龕

竟日雙扉掩陰陰草色侵石幢門外樹法相壁間尋借
渡石微窄鑿渠雨始深一燈綿晝夜蕭寂了無音

扶桑亭

虛亭立水面問樹乃稱奇不謂虬龍影能於隙地垂互
承欄並檻交接澗通池長日披襟坐攤書尤所宜

衆香樓

花扉深不測危立有層樓遙矚盈庭樹宛然別一丘坐
堪邀月下登或當山遊桂影趨簷際清芬却想秋

梅檀室

不來深處坐何以滌吾愁古井汲苔繡石牀吟素秋幽
香天際發奇致室中求僮僕諳清事支扉謝俗儔

張和

蘭陵秋夕

碧樹鳴秋葉芳塘斂夕波漏長稀箭刻樓迴逼星河候

雁迎霜早啼蜚傍月多懷人不能寐彈鋏起商歌

過桐君山

雲斷山疑合川回路忽分秋聲兩岸葉曉色萬峯雲
旅雁衝帆度寒蟬隔水聞嚴陵遺跡在我欲問桐君

蘭陵秋夕

月砌啼秋蛩風枝起夜禽洗愁燈下酒惜別夢中心露
重驚寒早更長覺漏沈明朝覽青鏡玄鬢有霜侵

祝顥

次陽明堡

晚次陽明堡登樓望雁門牛羊歸遠楚燈火映孤村塞
近風偏勁山高日易昏羈懷何以遣公館自開尊

途中即景

野曠雲初卷山晴翠欲流殘陽牛背笛新月水邊樓異
土逢佳景危途得勝遊浩然襟抱豁清興落滄洲

夜宿無錫

辭家無百里離思已紛紛旅泊今宵始鄉音此地分汀

沙籠宿霧星月挂疎雲回首寒山寺鐘聲杳不聞

姚夔

下峽

瞿塘天下險巫峽勢相連夾岸千尋壁中流一罅天山
空無獸迹江逼少人煙唯聽鼙鼙鼓朝牽百丈船

項忠

出清遠峽野望

行盡溪中路蒼茫見遠天歸猿啼曉日飛鳥入寒煙綠

樹江頭驛黃茅郭外田孤懷無限思望斷白雲邊

卜榮

寄隱者

曾訪巖棲處金鵝石榻前歌君紫芝曲和我白雲篇
火宿燒丹竈煙生種玉田林泉無限好三聘未幡然

陳憲章

送客

濃綠新春酒疎紅隔水花官人坐馬醉江路遶山斜桃

李成春徑牛羊散暮沙林泉無宿客興盡且還家

悅城

山作旌幢擁江絳鏡面平舟航乘曉發雲物入冬晴鼓
到江心絕槎衝石角橫經過悅城曲無語笑浮生

至陳冕家

遠樹晴堪數孤雲暝欲遮自憐江海跡能到友生家落
日明江色輕風動麥花相看吾鬢白不必問年華

古柳寄周京

西來何處水千里不平流入海魚龍喜懷山草木愁雨
邊明落日石角上孤舟寄語周京道勞生不自由

晚步二首

水國秋先至江村晚更幽泥筌收郭索山網落輶輶涼
入社門樹陰連渡口舟獨憐經畧地吾得放歌遊

居常懶出戶肯到社西頭海國諸峯暝乾坤六月秋微
涼生浦樹返照下西樓今夕蒲團上前山更卧遊

秋坐碧玉樓偶成

造次中秋過商量九日來詩將秋景澹菊共老人開時
節陶潛醉江山宋玉哀平生滄海意不受白鷗猜

題新村書齋壁

日色催江渡潮痕上石梯趨墟村婦出索哺襁兒啼樹
接黃村塢船移白石溪落花誰省記何必武陵迷
茅棟依巖靜柴門洗竹通桑榆巷南北煙火埭西東一
逕漁樵入孤村井臼同鄰家得美酒吹笛月明中

南歸寄鄉舊

碧草東西埭黃鸝遠近山巖春花氣足檐日鳥聲閒文
字虛堆几園林不設關一條烟際路朝往暮來還

居士舊茅齋蕭然倚玉臺獨尋寺裏去每到日西回魚
躍水萍破風推巖戶開小橋殘板在長訝有人來

省事除煩惱端居養靜虛栽花終恨少飲酒不留餘山
徑兒吹笛村田婦把鋤殷勤謝閭里勝事莫相疎

社西村

結茅依里社村以社西名客至惟談稼年衰不入城鄰

雞上樹宿水鶴傍人鳴向晚尋牛去前岡笛又車轉

次韻秋興感事寄東所

醉眠山影裏恨不與君同松下泉來冷雞鳴日過中就
牀梳白髮開戶納清風起視滄溟暮孤鴻沒遠空

春日江村

時候花先覺陰晴鳥自知登山嫌避客得句樂呼兒蔓
草披香徑垂楊覆淺漪美人期未至江月幾盈虧

喜梁文冠至

駐槳梅村夜風光勝早春直知花是路不覺月隨身草
木皆知舊江湖多賤貧短蓑來往數等是最閒人

石門

白髮非公事扁舟進此門山雲寒不雨江路曲通村玩
世吾何有長途馬不存晚來堪一醉江月照空樽

圭峯閣

勝處不在遠杪秋何處尋步崖碧澗落眠石青松陰地
少滄溟入山高雁驚沈此時閒佇望誰識倚闌心

春興

野晴花簇白山暖樹更青
郊酒醉欲睡午風吹又醒閒
拈曲江句勝讀法華經自在
山窓下跏趺趣已冥

野坐

團蓋青松午重裯綠草春
野晴鶯得意花盛蜨傷神
斷靄生西塢殘潮下暝津
竹根酣共卧不覺蘚沾身

鄭文康

與諸公酌酒

燕趙多豪傑悲歌不暇裁素知黃祖性敢恃襍衡才酒
盡月將落燭殘風又來下堦成獨步惆悵一興衰

題倪公禮隱居

家近閭門市清風一草廬窓明人問卜山晚僕收書客
笑鳩巢拙妻憐蟻甕虛城南炎熱地不識近何如

周鼎

送黃給事使滿刺國封王

遠國來王日深恩冊拜時璽書中禁出天語使臣知路

指諸蕃近山行四牡遲故人青瑣夢無限五雲思

江行

萬里雲濤上孤帆一羽輕霜清天宇闊沙白海潮平山
寺欲浮動鄰舟偶合并瓊花尚無恙回首廣陵城

郭登

過安南衛

絕頂見孤城征驂向曉行鳥啼多異響花發不知名石
澗閒雲碓山田趁火耕愁聞耆老說三月未曾晴

過西樵賈氏隱居

何處覓幽棲西樵更向西梨花千樹雪茅屋數聲雞澗
水穿林入春雲壓雨低仙源知近遠應使世人迷

自騰衝歸三月十五日夜至金齒

鄉思今春晚到邊花又飛嶺雲衝馬散山月照人歸遠
戍寒吹角孤城夜掩扉功名是何物猶未解征衣

柯潛

遊囊山寺

下馬松關外行行過虎溪鐘鳴知寺近雲暝覺天低斷
澗流泉澀平岡古木齊何時謝塵鞅此地卜幽棲

王與

宿沛縣泗亭驛

維舟當泗水涼雨洗炎蒸砧杵孤城月漁舟別浦燈客
愁秋更甚鄉夢遠難憑千古龍飛地令人感廢興

楊守陳

不寐

客夜耿無寐其如鐘漏稀入簾霜氣重當戶月華微切
切候蟲語蕭蕭寒葉飛擁衾成永歎不是為無衣

遊虎丘

出城纔數里已到白雲間但見門臨水那知寺有山鐘
鳴僧出定林動鶴飛還石磴行行遍花宮盡啓關

童軒

謫所有懷舊遊諸友

憶昔論交日相知盡少年季良身任俠叔度世稱賢夜

雨彈棊局春風放酒船飄零各分手愁絕越江邊

憶金陵

金陵佳麗地風景想依然城闕金湯固江山罨畫連晚
風樓上笛春水渡頭船惆悵曾遊處而今又幾年

東林小隱為沈處士題

小隱東林地身閒歲月忘曲池山倒影虛閣水生涼雨
潤琴絲慢風薰藥臼香羨君清趣好無夢到巖廊

雨中東鄭廣之揮使

咫尺長安道思君日倚樓寒烟籠野色春雨暗江流
燕麥悲新況鶯花感舊遊何時一相見攜手步滄洲

閒居漫興

一榻清於洗翛然思不羣紫苔行處滿黃鳥坐來聞
琴奏松間月碁敲石上雲蒲塘新水暖花落覆輕紋

鎮日掩柴局長歌醉復醒草生元亮井花簇子雲亭
夜玉裝琴軫秋金鑄硯屏都將舊遊事一笑晚山青

樗散真成癖支離類隱淪林深多綠蘚地僻少紅塵
酒

熟頻留客詩成不寄人清風無限樂即此見天真

擬唐

擬晚至華陰

馬首日將晡行行歲欲徂古祠寒蘚合仙掌斷霞孤山
暝聞啼鳥溪晴見浴鳧洛城知不遠宮樹晚模糊

擬晚發五溪

日暮添鄉思孤舟去路長蒹葭洲上月橘柚岸邊霜漢
水連天白岷山過雨蒼此中雖勝槩歸興詎能忘

寓白塔寺偶題

夜宿招提境蕭然世外踪
雨腥龍出洞月冷鶴歸松
影露林間塔聲傳澗底鐘
空門應不鎖常借白雲封

舟次瓜洲晚步田家

薄暮扣林扉柴荆掩夕暉
蔓長松葉暗草盛苴苗稀
寒犬迎人吠昏鴉接翅飛
客愁思佇立舟子苦催歸

白沙民舍

初日照林扉山深客到稀
柳溪鶯獨囀麥隴雉雙飛
少

婦提筐出中男荷畚歸盛時徵賦少生事莫嫌微

徐溥

歸樂堂

十年遊上國此日賦歸歟倦却風塵路來尋水竹居山
行春載酒門掩畫攤書薄暮投林鳥相看意自如

李裕

渡揚子江

曉經揚子渡畫舸一帆輕潮湧金山寺雲連鐵甕城江

豚吹浪白海日照林明坐聽鐘聲發悠然物外情

張寧

題姚公綬山水

幽意寫不盡萬山深更深白雲無出處綠樹漫成林啼
鳥醒人夢流泉淨客心何當隨釣艇看奕草堂陰

重遊金粟寺有作

溪深通小艇山峻露層臺林葉經霜盡河水近午開閒
雲僧出定舊雨客重來擾擾浮生路經過知幾迴

丘濬

村行

萬里勞行役驅車趁晚晴
鴉邊殘照遠雨外斷虹明
山徑高低路村春遠近聲
隔林人語寂一犬吠相迎

晚泊

風定帆初落籬根泊晚晴
寒潮隨月上秋水共天清
隔竹見燈影橫江聞鶴聲
有懷愁不寐坐數驛樓更

杜庠

送吳瓊州

瓊守相逢晚來從海外頭島微猶有國沙盡更無州風
雨迷蛟室雲霞結蜃樓喜聞為政好黎俗遍歌謳

陳贄

晚發五溪

巴川移短棹正值暮秋天客路猿聲裏鄉山雁影邊兼
葭連晚渚穠稌滿秋田風物雖堪戀其如歸思牽

劉溥

晚過揚州

長河懸落照短棹尚孤征
衰柳愁邊斷殘霞雨外明
人喧揚子渡鐘動廣陵城
漸去鄉關遠淒然倍旅情

齋居雜興

綠水平橋北青帘小巷西
酒香春甕滿山色晚樓低
半醉歌新曲閒眠改舊題
偶因乘雨出雙屐盡沾泥
情懷甘澹泊書史自逍遙
夜讀妨鄰睡晨眠誤客招
燕歸簾半捲鳥散竹還搖
雨足軒東圃綠溪認藥苗

北岫青當檻南園綠近門
蛛絲粘樹葉螳穴蝕花根
移石堵茶竈臨池濯酒尊
何須求分外遲起上朝暾
涼意生新浴幽情遠垢氛
雨堦行亂蟻風箔散飢蚊
興好多題扇神清不茹葷
有時絃綠綺橫膝奏南薰

詩客每相過書齋常不扃
雨生枯木菌風約小池萍
得興翻琴譜乘閒刻硯銘
近來耽野趣頻到水西亭

撫景憐秋盡觀書喜夜長
露蟲喧砌石風葉墜琴牀
舊集裁疏語新傳製墨方
曉來雙鶴舞蹈醉一庭霜

沈愚

寒食對酒留別金陵知己

別離頻對酒去住惜分襟
楚水歸帆遠吳門驛路深
曉鐘孤客夢寒月故鄉心
為語同袍者愁多莫苦吟

蘇正

南州有贈

天路無期到春湘帶恨流
亂山愁對酒落日獨登舟
書劍憐同客江湖耐薄遊
離心寄明月相逐遠悠悠

江南旅情

天涯為客久生計日蕭條旅况頻看月鄉心獨聽潮春
歸江上早家在夢中遙無限相思意東風白下橋

晏鐸

送曾與忠

送送臨岐路滄江欲暮時我懷殊未已君去獨何之鄉
國多歸夢天涯少故知別來明月夜無那思淒其

蔣主孝

居燕旅情

不上黃金臺早歌歸去來平沙無草木短褐有塵埃故
里愁言別明時敢論才燈前一舞劍豪氣轉成哀

思昔

昔日輕王猛如今重管寧烟塵猶浩蕩豪傑故飄零客
况風中絮交遊水上萍空憐乞米帖愁絕老橫經

旅邸有懷

風雨茅齋夜青燈照客眠故人霄漢上歸思楚江邊短

角吹殘夢長歌感昔年自憐身老大何以繼前賢

蔣主忠

經龍潭故居

不到故園久寧辭歸路遙山光自今昔人物歎蕭條古
鎮東西市長江旦暮潮何當尋舊業來此傍漁樵

王貞慶

分題得金山曉鐘送金璫歸婁東

孤刹天心起疎鐘月下鳴沈沈催曙色隱隱帶潮聲近

渚鷗羣散空林鶴夢驚扁舟有歸客歌枕不勝情

顧亮

郡齋獨酌憶蔡章陽馬仲穆諸君

半生徒碌碌百事未能周白屋方甘老朱門忽見收
登龍應有愧得馬正堪憂坐對盈樽酒寥寥憶舊遊

孫寧

送淵上人

遠公無定跡心與白雲閒瓶錫春風裏帆檣暮雨間鳥

啼臨水樹猿響隔溪山此際隨緣去家林幾日還

李錢

過潘韞輝東園

為愛東園好春來事事宜藥名人不識花信蝶先知晉
帖臨青李商歌咏紫芝小船乘興往何必訂幽期

徐貫

贈別張世禎

故人成久別邂逅客都城夜雨方論舊春風又送行鄉

關頻入夢雲樹遠含情迢遞清溪上相思對月明

鄭紀

送林慎學之官

相送東郊去秋雲驛路寒祇因為客久欲別故人難馬
向花間度琴攜竹外彈歸來不覺晚月色滿吟鞍

秦夔

和謝武選齋居

長樂疎鐘曉龍墀細柳春天香飄御仗紫袖引才人萬

乘求賢切諸公奏疏新幸逢虛己日忠謹在忘身

過高郵

四顧無山色蒼茫入望遙城池百戰在魚蟹四封饒小
市黃茅店孤村白板橋停舟問民俗風景頗蕭條

久雨

劍外天常漏江南雨亦多陰雲連晦朔潦水接江河漫
說禾生耳還聞麥化蛾憑誰問亢宰調變意如何

南山小隱

茅屋住山丘中事事幽茶香和雨摘果熟帶霜收石
鏡當窓見山泉隔幔流何時謝軒冕來伴竹林遊

陸鈇

次韻王元勛主事

一飯棲賢地居然久約中微涼庭過雨亂碧草生風荷
葉遮門近檐花映水空若非簪組繫便可老農同

李東陽

送茹知縣玉之新寧

乾坤三峽水今古一奇觀老覺襟懷壯貧嗟道路難
雲朝擁馬巖樹晚棲鸞萬里裁眉月青天盡處看

題倪雲林畫次倪韻

江雲亂人目江水綠人衣苔雨疑將濕林風聽漸稀
吳儂歌竹送越客采菱歸不見滄洲老垂楊拂舊磯

偶過匏菴見東軒成留壁上

吏靜真成隱居然市作郊
罅墻深嵌屋危樹巧安巢
竹老穿籬過棊清隔院敲
一枝如可借吾亦繫吾匏

送攸縣陳醫官

雨過攸江綠春深楚客歸岸花隨路發沙鳥背船飛門
對孤峯秀庭餘寸草暉杏林多舊樹應長去年圍

登南昌宿東湖口

落日豫章城歸帆第幾程草中南浦色樹裏北禽聲旅
宿依津處郵籤報客名東湖不可渡風雨坐天明

弋陽雨晴

暑伏秋先至天陰日易低沙痕平草樹雨脚見虹霓席

坐攤書滿船更聽鼓齊葛溪三百里川路隔東西

過玉山

扁舟隨所適茲地復躋攀雨久未妨旱路窮方見山斷
橋人獨去高嶼鳥孤還東望臨安郡潺湲一水間

題許廷冕職方畫

路轉循岡背橋回傍水根幽人不到處茅屋自成村浦
樹經秋落山鐘向晚昏偶然一攜手相與倒芳樽

姚綬

溪居

水暖鷓鴣浴花香蛺蝶飛青絲聊繫酒白苧已成衣
溪閣容蘭槩林深著板扉留賓將薄暮猶待釣魚歸

沈祭

再遊清溪

再發扁舟興茲遊不厭重溪山元有約昆弟且相從
北渚水銜月南皋雲在松誰云秋意晚猶及采芙蓉

吳伯通

送陳一之上舍賓城

都門雨初歇九陌紫埃清酌酒與君別看雲愴我情峽
楓秋後赤燕月夜深明去後如相憶因風數寄聲

吳與弼

山行

野水荒村僻雲林細路斜晴松張翠蓋秋果熟丹砂悵
望淹鄉曲蹉跎改歲華西風吹薄袂興緒繞天涯

禪嶺卽事

傍險躋攀倦臨高眺望賒天連蒼野闊樹帶小村斜晴
靄山何處寒烟屋數家躊躇懷往事容易改年華

羅頌

遊仙詩

蟠木倚滄溟花開隱耀靈高臨四海碧下視九州青地
遠無風雨天低動日星不須乘鶴去三島亦浮萍
幽徑赤城顛松蘿九曲連千林喧藥杵一嶂起茶煙深
竇源通海層巖樹隱天攜琴就猿鶴同種玉峯田

劉恕

喜從弟孟熙偕唐愚士楊思齊過宿山齋

淨掃松間榻孤懷得重陳
清尊今夜月華髮去年人病
欲拋詩卷閒思理釣緡殷勤
二三友相過莫辭頻

劉師邵

送張孝廉

別離知不遠情至亦潜然
樹引投京路鷗隨出浦船
去程秋雨裏歸夢曉霜前
親舊如相問卑棲似往年

寄虞衡王郎中

倏忽三載別故園
春又殘因風數問信
見月每凭闌
野服從相笑
塵冠未許彈
惟餘千里夢
夜夜遶長安

祝祺

海鹽天寧寺作

歸人征路晚
雲裏問僧家
獨樹臨秋水
孤城上暮鴉
山池芳草沒
疎磬夕陽斜
獨坐談經處
天風送落花

峴山望漢江

峴首一登眺春城花草繁江山迴楚國烟靄散荆門水
閣晴空寫風高夕浪翻襄陽冠蓋里甲第敞朱軒

姚翼

送人之京

送客京華去江干落日斜百年雙短鬢千里一浮槎柳
色河橋雨鶯聲驛路花明朝相憶處雲樹渺天涯

蘇大

江樓晚眺懷朱孝常

殊鄉歎行役登覽更淒其落日家千里故人天一涯渚
烟漁父艇江樹水神祠遠道交遊少憑誰慰所思

魯道

送孟繼之歸梁州

尊酒荆門客南征古道平雲連神女廟山繞夜郎城越
雋開荒服滇池隱旆旌相思日千里腸斷夜猿聲

滕鸞

秋日寫懷

秋色靜柴扉山光鎖翠微紫牽江行帶紅落渚蓮衣卧
病無人問思家有夢歸相看沙上鳥去住兩忘機

懷悅

開徑

開徑深林裏莓苔綠到門山多雲壓樹溪曲水通村補
屋交藤蔓疏渠破石根抱琴何處客過我共芳尊

魏時敏

寄周鶴洲太守

風雨越江邊
郵亭對夜眠
鄉心孤島遠
客夢一燈懸
訪舊懷他日
論時記昔年
離魂將別夢
幾度到臨川

和王文偉

最愛投閒日
尊鱸正及秋
鐘聲林下寺
燈影水邊樓
老去仍青眼
吟多易白頭
還思為客處
梧雨滴鄉愁

寄姑蘇劉欽謨


清貧終不厭
未老亦宜休
楊柳閭門曉
蒹葭震澤秋
園蔬乘雨種
林果帶霜收
感慨應懷古
題詩上虎丘

送朱琴友之戍海南

攜書兼帶劒未必事班超暫向天涯去休辭故國遙珠
蛇生暗隴蜃氣積寒潮別後知相憶琴窓謾寂寥



御選明詩卷五十三



總校官庶吉士臣侍朝
校對官檢討臣蕭九成
謄錄監生臣李本